

La Quotidiana 15-11-2013, p. 2

Intginas novaziuns tar la pestga

(cc) En la sessiun d'avust 2013 ha il cussegl grond dal Grischun concludì ina revisiun parziala da la lescha chantunala da pestga, cun la quala vegnan realisadas pliras novaziuns modernas ch'èn necessarias en il sectur da la pestga. Sa basond sin quai ha la regenza adattà las prescripziuns da pestga che entran en vigur ensemen cun la nova lescha. Las disposiziuns pertutgan en spezial il scumond d'entrar guatond en las auas, la protecziun da las litschelas, il dumber dals peschs ch'ins dastga pigliar per di e la pestga cun bartga.

Scumond d'entrar guatond en las auas: Cun la revisiun parziala da la lescha da pestga è vegnì abolì il scumond general d'entrar guatond en las auas dal chantun. Per proteger il cuaditsch da peschs e la gnivaziun d'utschels po la regenza restrencher localmain e temporarmain il dretg d'entrar guatond en il letg dal flum per pestgar. Per proteger las spezias da peschs pitschens che fregan la primavaira vegni perquai scumandà d'entrar guatond en las auas avant il 1. da zercladur. Ultra da quai sto vegnir dada in'attenziun speziala a la protecziun da la litschala che frega medemmain la primavaira. Per l'En en Engiadin'Ota vala perquai vinavant in scumond general d'entrar guatond en l'aua. Sin fundament d'ina cunvegna tranter ils chantuns Grischun e Son Gagl sto vegnir observà il scumond da guatar er al cunfin dal Rain alpin. La finala vala er in scumond general d'entrar guatond en il Lej Gravatscha per betg disturbar ils utschels da l'aua che cuan là.

Protecziun da las litschelas: Per proteger la populaziun da las litschelas en Engiadin'Ota vegn augmentada la mesira dals peschs ch'ins po pigliar per 2 centimeters a da nov 30 centimeters. En Engiadina Bassa èsi scumandà da pigliar litschelas. Il dumber da litschelas en Engiadina Bassa sto vegnir sustegnì cun correcziuns dals auas. Il moratori da pestga – per entant limità a 3 onns – garantisce ch'i na vegnan betg retratgs da l'En peschs adolescents.

Dumber dals peschs ch'ins dastga pigliar per di: Per augmentar l'attractivada da la pestga vegn auzada la limita dal dumber dals peschs ch'ins dastga pigliar per di en las auas stagnantas (vul dir en ils lais) da 6 a 10 peschs.

Pestga cun bartga: Sin il Lago d'Isola a San Bernardino è permessa da nov la pestga cun bartga. La permissiun vegn dada sin dumonda da la vischnanca da Mesauc e da las uniuns regionalas da pestga.